



L'atlet de Badiasport à arjunt n bun 27ejimo post

Saltè - Diego Tschaffert, campion europeich de liösa alta, à arjunt surafora sò obietif pro chësta gara da saltè. Pié ia él cun l'obietif da rové la gara, cí che n'è nia logich. Sön 1.400 pià ia al start nen él rové al travert ma 600, danter chisc inće Diego, sciöche 27ejim.

Cuntënt dl bun resultat, descriel la gara apëna fata sciöche ria: plü de 18 ores él saltè indöt sön 7.150 m de deslivel por 114 km. Te deplü perts rovâ le percurs sura i 2.500 m de altëza y les condiziuns tlimatiches, cun vënt, frëit, plöia y nêi, n'è nia dles mius. Implü rovâ i atlec tla nôt y messâ saltè cun pücia löm, cí che se damana na gran atenziun y sforz por tignì fora i prighi.

Sön les pedies di düches de Savoia

Le percurs che Diego à fat é un de cater percursc che le „Ultra Trail du Mont Blanc“ pîta: le TDS (Sur les Traces du Ducs de Savoie). Al passa fora por la Savoia y la Val d'Aosta: da

Courmayeur cina sò a pé dl dlaçià de Bionnassay y cun le travert a Chamonix. Al vëgn conzedü n tēmp mascimo de 31 ores por rové al travert y les carateristiches de chësc percurs se damana na buna preparaziun y autonomia personala. Le start è dales 7 da doman y Diego à arjunt le travert dales 2 de nôt, cun n tēmp de 18:47:49.

La belëza dl panorama che i cater percursc pîta n'à chësc ann nia podü gnì amirada por gauja dles condiziuns tlimatiches. Inçe i atri trëi percursc passa dūc incër le Mont Blanc, inçe sce sön d'atri trus, y à vignun d'atres carateristiches: le UTMB (Ultra Trail du Mont Blanc) passa fora por trëi staç (Talia, Francia y Svizera) y à 166 km de gara y 9.500 m de deslivel; le CCC (Courmayeur-Champex-Chamonix) 98 km y 9.500 m de deslivel; le PTL (La Petite Trotte à Léon) 300 km y 22.000 m de deslivel y é na gara a scuadres. Deplü informaziuns y i resultač di cater percursc ciàfon sön la plata internet www.ultratrailmb.com. Por ci che reverda i resultač dl TDS, percurs che Diego à fat, é rové pröm al travert Dawa Sherpa dal Nepal cun n tēmp de 14:37.07 y sciöche bele dit s'à Diego davagné le 27ejimo post.

Fontana: Badiasport



